

HITZ BITAN

ISTRIPUAK

Emakume bat hil da Donostian, motor batek harrapatuta

N.A.E. 65 urteko emakumea hil egin zen atzo Donostiako Altza auzoan, motor batek harrapatuta. Donostiako Udaltzaingoak jakinarazi duenez, ezbeharra 16:47ean gertatu zen, Lauaizeta kalean. Altzako alde zaharretik Lauaizetako parkera zihola, errepidea zeharkatzen ari zen emakumea bete-betean harrapatu eta hil egin zuen motorrak. A.S.L. motorraren gidariak eta harekin batera ziholan SM.P.T. gazteak ere zauri arinak izan zituzten.

Bi gizon zauritu dira Azpeitiko saihebidetan bi autok elkar jota

Bi autok elkar jo zuten atzo eguerdiko 13:00etan Azpeitiko saihebidetan (Gipuzkoa). Ezbeharren ondorioz, zauri nahiko larriak jasan zituen I.J.A.E. 50 urteko azpeitiarrak, eta Donostiako Ospitalera eraman behar izan zuten. Zauri arinagoak izan zituen berarekin batera autoan ziholan E.D.B. 20 urteko Azkoitiko gaztea.

BASOGINTZA

Araban, Bizkaian eta Gipuzkoan landatutako bost zuhaitzetik bat intsignis pinua da

2000. urtean 5.211 hektarea baso landatu ziren Araban, Bizkaian eta Gipuzkoan. Haietatik, 4.235 hektarea radiata edo intsignis pinukoak ziren. Pinu horren landaketak %8,6 egin du gora, eta behera, berriz, beste koniferenak edo hostozabalenak. Hurrengo asteburuan III. Basogintza Topaketak egingo dira Gasteizko Europa Jauregian, Iñaki Gerenabarrena Eusko Jaurlaritzako Nekazaritza sailburua bertan dela.

DROGA

350 dosi lortzeko adina haxix atzeman du Espainiako Poliziak Tuteran

Espainiako Poliziak 350 dosi egiteko adina haxix atzeman du Tuteran. Poliziak prentsa ohar baten bidez jakinarazi duenez, droga El Tubo izeneko auzoan atzeman zieten Aljeriako pasaportearen zuten sei laguni. Estasi pilula bat ere atzeman zieten.

KOMUNIKABIDEAK. 4.000 ale saldu nahi ditu 'Le Journal du Pays Basque-k'

DANIEL VELEZ / EPA

Kalean da 'Euskal Herriko Kazetaren' lehen alea

Ipar Euskal Herriko kioskoetan salgai izan zen atzo *Le Journal du Pays Basque-Euskal Herriko Kazeta* egunkariaren lehen alea. Egunkari berria na-

gusiki frantsesez izango da, baina euskarazko artikulak ere izango direla agindu du Hur Gorostiaga zuzendariak. Egunkari berriaren helburua *Sud Ouest*-i itzala egitea da Ipar Euskal Herrian. Lehen egunotan 8.000 aleko tirada izango duen arren, batez beste 4.000 ale saltzea da xedea. As-telehenetik larunbatera izango da salgai, sei liberratan.

EUSKARA

UPNren hizkuntz politika salatu dute sindikatu, guraso eta ikastetxe zuzendariek

Irene Arrizurieta | IRUÑEA

Azken urtean Nafarroako Gobernua egiten ari den hizkuntza politika salatu zuten atzo hainbat sindikatuk, D ereduan lan egiten duten hainbat zentroko zuzendariek eta guraso elkarteek, Iruñeko Hezkuntza Sailaren aurrean. Batik bat atezaintzako eta bulegarientzako euskara beharrezkoa ez dela dioen iraileko dekretua gaitzetsi zuten.

CCOO, ELA, LAB eta EILAS sindikatuak eta Herrikoa eta Sortzen-Ikasbatuaz guraso elkarteek ez ezik, Gobernuaren dekretua salatu dute honako ikastetxeetako zuzendariek: Eunate, Alaiz, Iturrama, Askatasuna, Biurdana, Berako Toki

Ona, Lekarotz-Elizondo, Irurita Gotzaia, Orreaga, Garralda, Agoitz, Leitza, Zizur, Doneztebe, Altsasuko Aralar Mikel Deuna I eta II institutua.

Izan ere, D eredua duten edo D ereduko zentroetan elebarrak diren langileak —atezainak eta bulegariak— jarri nahi ditu UPNk. Orain arte euskararen erabilera bermatzen zuen espazio fisiko bakarra ikastetxea izan da, baina aldaketarekin ezin izanen dute hori bermatu.

Iruñeko Txantrea auzoko Eunate institutuan saiatu da Gobernua dekretua lehenik dekretua aplikatzen. Atezainak gaitzagarria hartu zuen, eta ordeko elebarrak bidali zuten Nafarroako Lehendakaritza sailetik.

Zuzendaritzak salatu zuen hori ez zela bidezkoa, eta aldaketa eskatu ondoren, euskaraz zekien bat bidali zuten.

Kexa Nafarroako Parlamentura

Dena dela, Mikel Fernandez de Quincoces Eunateko zuzendaria ziurtatu zuen aurrerantzean postu horiek betetzeko zerrenda elebarrak erabiliko direla jakinarazi diela Nafarroako Gobernuak.

Dekretuaren helburua «elkarbizitzaren giroa hautsi eta arazoak sortzea» denez, taldeok kexa helaraziko diete Parlamentuko alderdiei. Halaber, aurtan argitaratutako euskararen aurkako dekretuak «baliorik gabe uzteko» lege ekimenak abiatu ditzaten eskatuko diete.

HIRUGARREN ADINA

Nagusi feriak 60 enpresa bilduko ditu bihartik Bilboko erakustazokan

Adineko lagunentzako Nagusi feria egingo dute bihartik eta igandera bitartean Bilboko Nazioarteko Erakustazokan. Aurtengo edizioan, adinekontzako aisialdi, osasun eta bestelako zerbitzuei buruzko bere eskaintza aurkeztuko dute 60 enpresak. Era berean, lau egunotan, gai ezberdinei buruzko ikastaro eta hitzaldiak eskainiko dituzte; hala nola, istripuak aurreikusteko moduak, Alzheimerra, ohitura osasuntsu edo adineko lagunen eskubideei buruzkoak. Nagusi feriak 73.000 bisitari izan zituen iaz.

OSASUNA

Antrax-az kezkatzeko arrazoirik ez dagoela dio Eusko Jaurlaritzak

Azken zortzi urteotan EAEn lupu kasurik egon ez dela eta «gaur egun kezkatzeko arrazoirik ez» dagoela adierazi zuen Eusko Jaurlaritzako Osasun Sailak, atzo. Antraxa gaixo dauden abelburuekin kontaktuan egon ostean kutsatzen dela, eta 1993. urtetik abereetan ere kasu bat bera ere izan ez dela nabarmendu zuten iturri berberak. Gaitz horren sortzailea *Anthraxis* baziloa da, eta pertsonen arteko kontaktu hutsarekin ez da kutsatzen. Lupua prebenitzeko botikarik edo txertorik hartzea gomendatzen ez dela jakinarazi du Osasun Sailak.

INGURUMENA

Errausteko plantaren afera «inuxentegiak» izan zirela ziurtatu du Pitillasko alkateordeak

Jesus Maria Sagardoi Pitillasko alkateordeak onartu egin zuen atzo herri horretako udala «inuxentegia» izan zela animalia hilak errausteko plantaren afera. «Proiektua tramitatu egin genuen herriarentzat ona zela uste genuelako, inori kontsulta egin gabe, ez genuelako pentsatu osasun edo ingurumen arazoak sortuko zituela», adierazi zuen Sagardoik Nafarroako Parlamentuko Nekazaritza batzordean. Parlamentuaren kanpoaldean errausteko plantaren aurka dauden Pitillasko 150 herritar elkartu ziren, alkateak eta udalak izan duten jarrera salatzeko.